



## საქართველოს იუსტიციის უმაღლესი საბჭო

ქ. თბილისი № 1/173

“ 18 ” ნოემბერი 2020 წ.

### ბ ა ნ კ ა რ ბ უ ლ ე ბ ა

#### მ. ფუხაშვილის მცხეთის რაიონული სასამართლოს სისხლის სამართლის საქმეთა კოლეგიის მოსამართლის თანამდებობაზე უვადოდ გამწესების შესახებ

„საერთო სასამართლოების შესახებ“ საქართველოს ორგანული კანონის 36-ე მუხლის მე-4 და 4<sup>1</sup> პუნქტების საფუძველზე და საქართველოს იუსტიციის უმაღლესი საბჭოს მდივნის თანდართული დასაბუთების შესაბამისად, მორის ფუხაშვილი 2020 წლის 1 დეკემბრიდან გამწესდეს მცხეთის რაიონული სასამართლოს სისხლის სამართლის საქმეთა კოლეგიის მოსამართლის თანამდებობაზე უვადოდ, კანონით დადგენილი ასაკის მიღწევამდე.

ნინო ქადაგიძე

საქართველოს უზენაესი სასამართლოს თავმჯდომარე  
საქართველოს იუსტიციის უმაღლესი საბჭოს თავმჯდომარე

**დასაბუთება**  
**მორის ფუხაშვილის მცხეთის რაიონული სასამართლოს**  
**მოსამართლის თანამდებობაზე დანიშვნის თაობაზე**

„საერთო სასამართლოების შესახებ“ საქართველოს ორგანული კანონის 35-ე მუხლის საფუძველზე საქართველოს იუსტიციის უმაღლესი საბჭოს მიერ 2020 წლის 26 ივნისის №1/89 გადაწყვეტილებით გამოცხადდა მოსამართლეობის კანდიდატთა შესარჩევი კონკურსი საერთო სასამართლოების სისტემაში არსებულ ვაკანსიებზე. მათ შორის მცხეთის რაიონული სასამართლოს სისხლის სამართლის საქმეთა კოლეგიის მოსამართლის 1 ვაკანტურ თანამდებობაზე.

კანდიდატთა რეგისტრაცია მიმდინარეობდა 2020 წლის 29 ივნისიდან 19 ივლისის ჩათვლით. მითითებულ ვაკანსიაზე დარეგისტრირდა 24 კანდიდატი.

2020 წლის 24 ივლისიდან 21 აგვისტომდე მოსამართლის საქმიანობის შეფასების მართვის დეპარტამენტის მიერ კონკურსში მონაწილე კანდიდატებზე, მათ შორის მორის ფუხაშვილზე მოძიებულ იქნა „საერთო სასამართლოების შესახებ“ საქართველოს ორგანული კანონის 35<sup>2</sup> მუხლით გათვალისწინებული ინფორმაცია, რომელიც იუსტიციის უმაღლესი საბჭოს წევრებს წარედგინათ 24 აგვისტოს.

**კანდიდატის შესახებ მოძიებული ინფორმაცია:**

მორის ფუხაშვილს აქვს სპეციალობით მუშაობის 35-წლიანი, მათ შორის მოსამართლედ მუშაობის 20-წლიანი გამოცდილება. იგი 1999-2019 წლებში იყო საერთო სასამართლოების მოსამართლე.

მოსამართლედ მუშაობის პერიოდში მის მიმართ არ დაწყებულა დისციპლინური დევნა, არ ყოფილა გამოყენებული დისციპლინური სახდელი ან დისციპლინური ზემოქმედების ღონისძიება.

იგი 2011 წელს ეწეოდა პედაგოგიურ საქმიანობას ილიას სახელმწიფო უნივერსიტეტსა და იუსტიციის უმაღლეს სკოლაში.

არის სამართლებრივი წიგნის - „სახელმძღვანელო წინადადებები სისხლის სამართლის საქმეებზე განაჩენის ფორმის, მისი დასაბუთებულობისა და ტექსტის სტილისტიკური გამართულობის თაობაზე“ თანაავტორი.

**კანდიდატთან გასაუბრება:**

საბჭოს წევრების მიერ კანდიდატების შესახებ მოძიებული ინფორმაციის გაცნობის შემდეგ დაინიშნა კანდიდატებთან გასაუბრება. საბჭოს წევრები კანდიდატ მორის ფუხაშვილს გაესაუბრნენ 16 ოქტომბერს. გასაუბრება წარიმართა ღია სხდომაზე და მას ესწრებოდნენ არასამთავრობო ორგანიზაციების წარმომადგენლები.

**კანდიდატის შეფასება:**

2020 წლის 5 ნოემბრიდან 12 ნოემბრამდე პერიოდში იუსტიციის უმაღლესი საბჭოს 15-მა წევრმა კანდიდატი მორის ფუხაშვილი შეაფასა კომპეტენტურობისა და კეთილსინდისიერების კრიტერიუმების მიხედვით.

მორის ფუხაშვილის კეთილსინდისიერების კრიტერიუმით შეფასებისას, საბჭოს შემფასებელმა 14-მა წევრმა მიიჩნია, რომ იგი სრულად აკმაყოფილებს აღნიშნულ კრიტერიუმს, ხოლო ერთმა წევრმა მიიჩნია, რომ აკმაყოფილებს.



საბჭოს წევრთა მიერ მორის ფუხაშვილის კომპეტენტურობის კრიტერიუმით შეფასებისას ამ კრიტერიუმების მახასიათებლების მიხედვით კანდიდატის მიერ მოპოვებულმა ქულათა ჯამმა შეადგინა 1245 ქულა, რაც ქულების მაქსიმალური რაოდენობის 83%-ია.

**კენჭისყრის შედეგები:**

2020 წლის 18 ნოემბერს მცხეთის რაიონული სასამართლოს სისხლის სამართლის საქმეთა კოლეგიის მოსამართლის ვაკანსიაზე ჩატარებული კენჭისყრის შედეგად, რომელშიც მონაწილეობა საბჭოს 14-მა წევრმა მიიღო, მორის ფუხაშვილმა მოიპოვა 11 ხმა.

აღნიშნულ ვაკანსიაზე ბიულეტენში შეყვანილ იქნა 8 კანდიდატი, მათგან 7 ყოფილი მოსამართლე და 1 იუსტიციის უმაღლესი სკოლის ყოფილი მსმენელი, კერძოდ:

- |                               |                              |
|-------------------------------|------------------------------|
| 1. გიორგაშვილი სანდრო - 0 ხმა | 5. ნადოი რეზო - 1 ხმა        |
| 2. გოგალაძე ირმა - 0 ხმა      | 6. ფუხაშვილი მორის - 11 ხმა  |
| 3. დარახველიძე გიორგი - 1 ხმა | 7. შოშიაშვილი მაია - 0 ხმა   |
| 4. ლობჯანიძე გიორგი - 0 ხმა   | 8. ჯვარშიშვილი მაია - 1 ხმა. |

**დასკვნა:**

კანდიდატის - მორის ფუხაშვილის კეთილსინდისიერების (საბჭოს 14-მა წევრმა მიიჩნია, რომ იგი სრულად აკმაყოფილებს აღნიშნულ კრიტერიუმს) და კომპეტენტურობის (სამართლებრივი ნორმების ცოდნის, წერის უნარის, პროფესიული თვისებების) კრიტერიუმების გათვალისწინებით, კენჭისყრის შედეგების საფუძველზე, სხვა 7 კანდიდატთან შედარებით უპირატესობა მიენიჭა და შესაბამისად, მცხეთის რაიონული სასამართლოს სისხლის სამართლის საქმეთა კოლეგიის მოსამართლის თანამდებობაზე უვადოდ, კანონით დადგენილი ასაკის მიღწევამდე განწესდა მორის ფუხაშვილი.

ნიკოლოზ მარსაგიშვილი  
საქართველოს იუსტიციის  
უმაღლესი საბჭოს მდივანი

